



**REPUBLIKA E SHQIPËRISË
PRESIDENTI**

V E N D I M

Nr. 404, datë 25.11.2019

“PËR MIRATIMIN E RREGULLORES

**“PËR PËRCAKTIMIN E PROCEDURËS DHE RREGULLAVE TË HEDHJES SË
SHORTIT PËR ZGJEDHJEN E ANËTARËVE TË KËSHILLIT TË EMËRIMEVE
NË DREJTËSI”**

Në mbështetje të nenit 149/d, pika 3, të Kushtetutës së Republikës së Shqipërisë, si dhe të nenit 221 pika 9, të ligjit nr. 115/2016 “Për organet e qeverisjes së sistemin të drejtësisë”, të ndryshuar,

VENDOSA:

Neni 1

Miratimin e rregullore “Për përcaktimin e procedurës dhe rregullave të hedhjes së shortit për zgjedhjen e anëtarëve të Këshillit të Emërimeve në Drejtësi”, sipas tekstit që i bashkëlidhet këtij vendimi.

Neni 2

Ngarkohet Sekretari i Përgjithshëm i Institucionit të Presidentit të Republikës për ndjekjen e zbatimit të kësaj rregulloreje.

Neni 3

Ky vendim hyn në fuqi menjëherë.

PRESIDENTI I REPUBLIKËS





**REPUBLIKA SHQIPËRISË
INSTITUCIONI I PRESIDENTIT TË REPUBLIKËS**

RREGULLORE

**“PËR PËRCAKTIMIN E PROCEDURËS DHE RREGULLAVE
TË HEDHJES SË SHORTIT PËR ZGJEDHJEN E ANËTARËVE
TË KËSHILLIT TË EMËRIMEVE NË DREJTËSI”**

Në mbështetje të nenit 149/d, pika 3, të Kushtetutës së Republikës së Shqipërisë, të nenit 221 pika 9 të ligjit nr.115/2016 “Për organet e qeverisjes në sistemin e drejtësisë”, të ndryshuar, miratohet kjo rregullore që do të zbatohet për hedhjen e shortit për zgjedhjen e anëtarëve të Këshillit të Emërimeve në Drejtësi”, nga Presidenti i Republikës.

**Neni 1
Qëllimi**

Kjo rregullore ka për qëllim të përcaktojë procedura dhe rregulla të hollësishme për organizimin e shortit për përzgjedhjen e anëtarëve të Këshillit të Emërimeve në Drejtësi (KED) nga Presidenti i Republikës.

Neni 2

Hedhja e shortit për zgjedhjen e anëtarëve të Këshillit të Emërimeve në Drejtësi i nënshtrohet parimeve të transparencës, gjurmueshmërisë dhe monitorimit të këtij procesi.

Procedura e përzgjedhjes me short e anëtarëve të KED kryhet në mjediset e Institucionit të Presidentit të Republikës, në sallën “Skënderbej”.

**Neni 3
Subjektet**

Në mbështetje të nenit 149/d të Kushtetutës dhe ligjit nr.115/2016, subjekte kandidat të përzgjedhjes me short për të qenë anëtarë të KED-së janë:

- gjyqtarët e Gjykatës Kushtetuese;
- gjyqtarët e Gjykatës së Lartë;
- prokurorët e Prokurorisë së Përgjithshme;
- gjyqtarët nga gjykatat e apelit;
- prokurorët nga zyrat e prokurorisë pranë gjykatave të apelit;
- gjyqtarët e gjykatave administrative.

Sipas nenit 149/d të Kushtetutës Këshilli Emërimeve në Drejtësi përbëhet nga 9 anëtarë të përzgjedhur me short, nga radhët e gjyqtarëve dhe prokurorëve, ndaj të cilëve nuk është dhënë masë disiplinore. Ata ushtrojnë detyrën me mandat një-vjeçar, që fillon në datën një janar të çdo viti kalendarik.

Këshilli i Emërimeve në Drejtësi përbëhet nga 9 anëtarë si më poshtë:

- **dy gjyqtarë** nga Gjykata Kushtetuese;
- **një gjyqtar** nga Gjykata e Lartë;
- **një prokuror** nga Prokuroria e Përgjithshme;
- **dy gjyqtarë** nga Gjykatat e apelit;
- **dy prokurorë** nga Gjykatat e apelit,
- **një gjyqtar** nga gjykatat administrative.

Janë subjekte të këtij procesi, të përzgjedhjes me short si anëtarë të KED-së, vetëm ata magistratë dhe gjyqtarë të Gjykatës Kushtetuese, të cilët, në momentin e organizimit të shortit, plotësojnë kushtet dhe kriteret e parashikuara në Kushtetutë dhe në nenin 221 të ligjit nr. 115/2016 “Për organet e qeverisjes së sistemit të drejtësisë”, të ndryshuar.

Neni 4

Për organizimin e procedurave të hedhjes së shortit dhe dokumentimin e çdo faze të saj, krijohet një Sekretariat Teknik. Sekretari i Përgjithshëm, me urdhër të brendshëm, përcakton numrin dhe përbërjen e Sekretariatit Teknik për administrimin e gjithë informacionit të ardhur nga institucionet përkatëse, si dhe për përgatitjen e gjithë bazës materiale dhe kryerjen e detyrave respektive në funksion të procesit të përzgjedhjes me short të anëtarëve të KED-së.

Neni 5

Administrimi i materialeve dhe informacionit të nevojshëm

Informacionet zyrtare shkresore për kandidatët që plotësojnë kriteret ligjore për t’iu nënshtruar shortit për të marrë pjesë në KED, të përcjella nga Gjykata Kushtetuese, Këshilli i Lartë Gjyqësor dhe Këshilli i Lartë i Prokurorisë, administrohen nga Sekretaria Teknike në Institucionin e Presidentit të Republikës në funksion të procesit të përzgjedhjes me short të anëtarëve të KED-së. Presidenti i Republikës pas administrimit të listave të kandidatëve kërkon dhe siguron informacionin e nevojshëm dhe të azhurnuar nga institucionet respektive me qëllim që të garantohet një proces objektiv dhe transparent në respekt të Kushtetutës dhe ligjit.

Neni 6

Procedura e përzgjedhjes me short të anëtarëve të KED-së kryhet midis datave 1 dhe 5 dhjetor të çdo viti kalendarik. Presidenti i Republikës cakton me vendim datën e organizimit të procedurës së përzgjedhjes me short të anëtarëve të Këshillit të Emërimeve në Drejtësi.

Ky vendim publikohet në faqen zyrtare të Institucionit të Presidentit të Republikës, në rubrikën përkatëse për këtë qëllim. Në këtë rubrikë publikohet lista e kandidatëve e dërguar nga institucionet

përkatëse, aktet e përditësimit të listës dhe të dhënave të administruara deri në momentin e zhvillimit të shortit, procesverbalet, si dhe aktet e shpalljes të rezultatit të shortit sipas ligjit.

Neni 7

Institucioni i Presidentit të Republikës njofton zyrtarisht për datën, orën dhe vendin e organizimit të shortit, Kryetarin e Gjykatës Kushtetuese, Kryetarin e Këshillit të Lartë Gjyqësor dhe Kryetarin e Këshillit të Lartë të Prokurorisë, të cilët ftohen të dërgojnë një përfaqësues të tyre për të qenë të pranishëm përgjatë organizimit të shortit.

Përfaqësuesit e Institucioneve, të ftuar për të marrë pjesë në organizimin e shortit, nuk duhet të jenë të njëjtë me personat e përfshirë në listën e kandidatëve pjesëmarrës në short për tu zgjedhur anëtarë të KED-së.

Mosparaqitja e përfaqësuesve të këtyre institucioneve të ftuar nuk pezullon procedurën e hedhjes së shortit.

Neni 8

Në datën, orën dhe vendin e përcaktuar për organizimin e procedurës së hedhjes së shortit, njoftohet të marrë pjesë Avokati i Popullit, si vëzhgues i të gjithë procedurës së hedhjes së shortit, të cilit i vihen në dispozicion dhe materialet e administruara nga Sekretariati Teknik.

Presidenti i Republikës mund të ftojë për të qenë i pranishëm përgjatë procedurës së hedhjes së shortit edhe përfaqësues të Kryetarit të Kuvendit të Shqipërisë, grupeve parlamentare, përfaqësitë e huaja diplomatike të akredituara në Republikën e Shqipërisë, përfaqësues të Komisionit të Pavarur për Koordinimin, Monitorimin dhe Ndjekjen e Zbatimit të ligjit nr.115/2016 “Për Organet e Qeverisjes së Sistemit të Drejtësisë”, apo organizata partnere.

Në momentin e zhvillimit të shortit ftohen të jenë të pranishëm media.

Mosparaqitja e Avokatit të Popullit apo e të ftuarve nuk pezullon procedurën e hedhjes së shortit.

Neni 9

Procedura e përzgjedhjes me short e anëtarëve të KED-së, dokumentohet përmes procesverbalit të Sekretarisë Teknike dhe pamjeve filmike të xhiruara nga punonjësi i Institucionit të Presidentit të Republikës që nga fillimi i procedurës deri në mbarimin e saj, në përputhje me përcaktimet e nenit 10 të kësaj rregulloreje.

Media është e lirë të ketë të pranishëm përfaqësuesit e saj të akredituar për të ndjekur, dokumentuar dhe transmetuar drejtpërdrejt të gjithë procesin me zë dhe figurë.

Institucioni i Presidentit të Republikës fton për të dokumentuar zyrtarisht me transmetim të drejtpërdrejt këtë proces Televizionin Publik Shqiptar. Në përfundim të procesit, Institucioni i

Presidentit të Republikës, siguron zyrtarisht nga TVSH-ja, CD apo materialin filmik që bëhet pjesë e dosjes së hedhjes së shortit dhe ruhet në arkivën e institucionit sipas ligjit.

Neni 10

Detyrat e Sekretariatit Teknik

1. Sekretari i Përgjithshëm i Institucionit të Presidentit të Republikës, përmes një urdhri të brendshëm, ngre Sekretariatit Teknik që do të ndjekë, realizojë, verifikojë dhe mbështesë të gjithë dokumentacionin dhe infrastrukturën e nevojshme për procesin e përzgjedhjes me short të anëtarëve të KED-së.
2. Detyrat e Sekretariatit Teknik për ndjekjen dhe administrimin e procedurës së përzgjedhjes me short të anëtarëve të KED-së, janë si vijon:

2.1 Një ditë përpara ditës së përcaktuar kur do të zhvillohet procedura e përzgjedhjes me short të anëtarëve të KED, por në çdo rast jo më vonë se 12 (dymbëdhjetë) orë përpara fillimit të kësaj procedure, Sekretariati Teknik verifikon në vend dhe konstaton nëse e gjithë infrastruktura e nevojshme për kryerjen e kësaj procedure është në përputhje me rregullat e përcaktuara në ligjin nr. 115/2016 dhe në këtë rregullore.

2.2 Nëse e gjithë infrastruktura është në përputhje me rregullat e përcaktuara, Sekretariati Teknik harton procesverbalin përkatës dhe informon me shkrim Sekretarin e Përgjithshëm të Institucionit të Presidentit të Republikës.

2.3 Nëse nga ana e Sekretariatit Teknik konstatohen parregullsi që vlerësohen se cenojnë procedurën e përzgjedhjes me short të anëtarëve të KED-së, atëherë Sekretariati Teknik lajmëron paraprakisht, si dhe informon me shkrim Sekretarin e Përgjithshëm për këto parregullsi të vërejtura. Vetëm pas ndreqjes të parregullsive të konstatuara dhe miratimit me shkrim të Sekretariatit Teknik për ndjekjen dhe verifikimin e procedurës së përzgjedhjes me short të anëtarëve të KED-së, procedura vazhdon normalisht. Kjo procedurë ndiqet për çdo rast e për çdo problematikë që mund të shfaqet deri në momentin e caktuar për hedhjen e shortit. Sekretari i Përgjithshëm në bashkëpunim me Administratën e Institucionit dhe Kabinetin e Presidentit, merr masat, për ndreqjen e parregullsive të konstatuara

2.4 Media e ftuar, specialisti (kameramani) i Institucionit të Presidentit të Republikës dhe i Televizionit Publik Shqiptar do të dokumentojë me pamje (xhirime) filmike të gjithë procedurën e hedhjes së shortit të anëtarëve të KED-së. Jo më vonë se një ditë nga mbarimi i kësaj procedure, Institucioni i Presidentit të Republikës siguron nga TVSH-ja zyrtarisht materialin origjinal filmik të xhiruar të papërpunuar (CD) pranë Sekretariatit Teknik. I njëjti material i papërpunuar (bruto) filmik i krijuar nga specialist kameraman i Institucionit të Presidentit të Republikës, dorëzohet pranë Sekretariatit Teknik dhe bëhet pjesë e dosjes.

2.5 Pas përfundimit të procedurës së përzgjedhjes me short të anëtarëve të KED-së, Sekretariati Teknik harton dhe nënshkruan procesverbalin përfundimtar të kësaj procedure dhe administron

të gjithë dokumentacionin përkatës që lidhet me kryerjen e procedurës së përzgjedhjes me short të anëtarëve të KED-së, si dhe të gjithë infrastrukturën logjistike për kryerjen e kësaj procedure. Sekretariati Teknik në përfundim harton aktet për miratim nga Presidenti i Republikës.

2.6 Të gjithë anëtarët e Sekretariatit Teknik për ndjekjen dhe administrimin e të gjithë dokumentacionit dhe infrastrukturës logjistike të procesit të përzgjedhjes me short të anëtarëve të KED-së, janë të pranishëm përgjatë zhvillimit të të gjithë procedurës për realizimin e detyrave të ngarkuara.

Neni 11

Procedurat e zhvillimit të shortit realizohen nën drejtimin e Presidenti i Republikës, sipas rregullave të përcaktuara në Kushtetutë, në ligjin nr. 115/2016 “Për organet e qeverisjes së sistemin të drejtësisë”, të ndryshuar dhe në këtë rregullore.

Presidenti i Republikës autorizon zyrtarin e Institucionit të Presidentit të Republikës që do të kryejë tërheqjen e goglave, në përputhje me rregullat e përcaktuara në nenin 12 të kësaj rregulloreje.

Neni 12

Procedura e përzgjedhjes

1. Procedura për përzgjedhjen me short të anëtarëve të KED-së do të jetë ajo e përzgjedhjes rastësore me dorë të goglës/ave nga ena (vazo) nga ana e përfaqësuesit të autorizuar.
2. Për kryerjen e procedurës së përzgjedhjes me short të anëtarëve të KED-së do të ndiqen procedurat e mëposhtme:

- 2.1 Shorti organizohet në tre enë (vazo) të tejdukshme. Në njërën vendosen goglat bosh, në kutinë/enën tjetër vendosen shiritat ku janë shënuar emrat e kandidatëve të propozuar nga secili institucion sipas listës dërguar Presidentit të Republikës dhe që kualifikohen të marrin pjesë në short, ndërsa në enën/kutivë e tretë (*ena/kutia transparente rrotulluese*) vendosen goglat pasi në to, janë futur shiritat e emrave të kandidatëve që do të shortohen. Të gjitha materialet vendosen në tavolinë, afër vendit ku do të zhvillohet procedura e hedhjes së shortit që mundëson shikim të qartë nga të pranishmit në sallë dhe kamera.
- 2.2 Emri i çdo kandidati, i cili merr pjesë në short, është i shënuar në shirita letre. Çdo shirit letre me emrin e secilit kandidat lexohet me zë të lartë, bëhet e dukshme për të pranishmit dhe kamerat dhe futet e mbyllet në një gogël. Numri i goglave duhet të përputhet me numrin e kandidatëve të propozuar për secilin institucion dhe që, në ditën e zhvillimit të shortit, përmbushin kushtet dhe kriteret për të marrë pjesë në short. Asnjë prej goglave nuk duhet të ketë shenja dalluese vizive apo fizike që të bëjnë të mundur identifikimin nga goglat e tjera.
- 2.3 Goglat nuk duhet të jenë të tejdukshme për të mos lejuar për asnjë rast leximin apo identifikimin e përmbajtjes së shiritave të letrave brenda tyre.

- 2.4 Në përputhje me nenin 10, pika 2, Sekretariati Teknik shqyrton paraprakisht një nga një goglat që të jenë në përputhje me pikat 2.1, 2.2 dhe 2.3 të këtij neni.
- 2.5 Personi i autorizuar nga Presidenti i Republikës fton një nga personat e ftuar të pranishëm në sallë në mënyrë rastësore të bëjë ndonjë verifikim për cilësitë fizike të goglave me sy të lire, nëse ndonjë prej tyre ka shenja apo karakteritike dalluese.
3. Personi i autorizuar përpara përzgjedhjes me short sqaron procedurën e shortit për pjesëmarrësit dhe radhën e përzgjedhjes së tyre sipas këtij neni.
4. Radha e futjes së goglave në enë/vazo dhe radha e hedhjes së shortit për përzgjedhjen e anëtarëve të KED është si vijon:
- kandidatë nga Gjykata Kushtetuese;
 - kandidatë të Gjykatës së Lartë;
 - kandidatë të Prokurorisë së Përgjithshme;
 - kandidatë nga gjykatat e apelit
 - kandidatë nga prokuroritë pranë gjykatave të apelit
 - kandidatë nga gjykatat administrative
5. Sipas radhës së përcaktuar në pikën 4, një prej anëtarëve të Sekretariatit Teknik lexon me zë të lartë, me radhë të gjithë emrat kandidatëve që përfshihen në short dhe tregon letrën ku është shënuar çdo emër nga kamerat dhe të pranishmit dhe e vendos atë brenda gogllës. Më pas gogla vendoset në enën rrotulluese të tejdukshme.
6. Përfaqësuesi i autorizuar, pasi përzien në mënyrë mekanike goglat e vendosura në enën e tejdukshme ku bëhet përzgjedhja, bën tërheqjen e gogllës nga ena.
7. Përfaqësuesi i autorizuar, i cili ka bërë tërheqjen e gogllës në enë, hap gogllën dhe lexon me zë të lartë emrin e kandidatit dhe tregon shiritin e letrës së përzgjedhur të pranishmëve në sallë dhe kamerave.
8. Shiriti i letrës i nxjerrë nga gogla e përzgjedhur dhe i lexuar i dorëzohet Sekretariatit Teknik për vënien në dukje të emrit në procesverbal. Kandidati, emri i të cilit është shënuar në shiritin e letrës, do të jetë anëtar i Këshillit të Emërimeve në Drejtësi.
9. Pasi përfundon zgjedhja e anëtarëve të KED-së, me të njëjtën procedurë zgjidhet edhe anëtari zëvendësues i KED-së për secilin institucion sipas parashikimeve në nenin 221 pika 7 e ligjit nr. 115/2016 “Për organet e qeverisjes së sistemit të drejtësisë”, të ndryshuar.
10. Përfaqësuesi i autorizuar, pas përzgjedhjes me short të anëtarit/anëtarëve për secilin institucion, fton një prej anëtarëve të Sekretarit Teknik të tërheqë goglat që gjenden brenda enës (vazos) për zbrazjen e plotë të saj.

11. Pas zbrazjes së enës/vazos, në të futen goglat me emrat e kandidatëve të dërguar nga institucioni tjetër, sipas radhës së përcaktuar në pikën 12.4 të kësaj rregulloreje. Procedura e hedhjes së shortit përsëritet në të njëjtën mënyrë për përzgjedhjen e anëtarëve prej kandidatëve të institucioneve përkatëse, sipas radhës së përzgjedhjes së përcaktuar në nenin 12, pika 4.

Neni 13

Rezultati përfundimtar i shortit të hedhur shpallet nga Presidenti i Republikës. Rezultatet e shortit bëhen publike menjëherë në faqen zyrtare të Institucionit të Presidentit të Republikës dhe i dërgohen zyrtarisht Gjykatës Kushtetuese, Këshillit të Lartë Gjyqësor dhe Këshillit të Lartë të Prokurorisë, në mënyrë që ky njoftim t'u përcillet dhe kandidatëve të përzgjedhur. Njoftimi mbi rezultatet e shortit i përcillet për dijeni Kuvendit të Shqipërisë dhe Gjykatës së Lartë.

Neni 14

Siguria e ambjenteve ku zhvillohet shorti

Pas përfundimit të procesit të konstatimit të rregullshmërisë së infrastrukturës logjistike për procedurën e përzgjedhjes së anëtarëve të KED-së, në përputhje me detyrat/rregullat e përcaktuara në nenin 10 pika 2.1. 2.2, 2.3, salla ku do të zhvillohet kjo procedurë mbyllet dhe vuloet nga Garda e Republikës dhe pas atij momenti nuk lejohet të hyjë askush për asnjë arsye.

Rregullat e veprimit dhe ruajtjes së mjediseve të brendshme të Institucionit të Presidentit të Republikës janë të përcaktuara në nenin 23 të vendimit nr. 230/1, datë 02.02.2011, "Për miratimin e Rregullors së brendshme "Për organizimin dhe funksionimin e Institucionit të Presidentit të Republikës"", janë të vlefshme dhe për zbatimin e kësaj Rregulloreje.

Neni 15

Ngarkohet Sekretari i Përgjithshëm dhe Sekretariati Teknik për ndjekjen dhe zbatimin e kësaj rregullore.

Neni 16

Hyrja në fuqi

Kjo rregullore hyn në fuqi menjëherë.

PRESIDENTI I REPUBLIKËS

ILIR META

